

Evening Dogri News Bulletin, 05 April. 2026

इवनिंग डोगरी न्यूज़ बुलेटिन

समे .18:15 Hrs

<><><><><><>

Headlines

1. केंद्र सरकार नै साफ कीता ऐ जे भारत ईरान सने 40 मुलखें थमां कच्चे तेल दी खरीद करा'रादा ऐ। भुगतान सरबन्धी रूकावटें दी खबरें दा बी खंडन कीता ऐ।
2. पी.एम ई-बस सेवा स्कीम तैहत जम्मू-कश्मीर च तौले गै 200 इलेक्ट्रिक बसां शैहरी सार्वजनिक यातायात च शामिल होआ करदियां ना।
3. ईस्टर दा ध्यार जम्मू-कश्मीर च बड़े जोशो-खरोश कन्नै मनाया जा'रदा ऐ।
4. जम्मू-कश्मीर बवसायिक प्रवेश परीक्षा बोर्ड नै शैक्षणिक सत्र 2026-27 लेई 10मीं आधारित डिपलोमा पैरामेडिकल कोर्सें च दाखले लेई सांझी प्रवेश परीक्षा दा आयोजन कीता।
5. जम्मू-कश्मीर च 10 अप्रैल तोड़ी मौसम गड़बड़ी आला बने दे रौहने दे इमकान दस्से गेदे ना।

<><><><><><>

Puri-Crude Oil

पेट्रोलियम ते कुदरती गैस मंत्री हरदीप सिंह पुरी होरें आखेआ जे भारत, ईरान सने 40 कोला मते मुलखें कोला कच्चा तेल हासल करै करदा ऐ ते ईरान गी तेल भुगतान च कोई समस्या नेई ऐ। अपनी इक सोशल मीडिया पोस्ट च पुरी होरें आखेआ ऐ कि एह दावे सरासर झूठे ते बेबुनियाद न जे ईरान गी तेल दे भुगतान करी कोई दिक्कतां आवा'रदियां न जेह्दे कारण इक जहाज गी चीन आहली बक्खी मोड़ी दित्ता गेदा ऐ। पुरी होरें आखेआ कि देश दिएं रिफाइनरिएं च ईरान सने कई होर मुलखें थमां बी कच्चा तेल आवा करदा ऐ ते संचालन चा बवसायिक कारणें

करी ज्हाज अपना रस्ता बदलदे रौहंदे ना। मंत्री होरें एहू बी साफ कीता ऐ जे तेल कंपनिएं कश बक्ख-बक्ख मुल्खें थमां कच्चा तेल खरीदने दे इख्तयार न, इस करियै इत्त सरबंधी कोई समस्या मुल्खै बंदर नेई ऐ।

<><><><><><>

Electric-Buses

जम्मू-कश्मीर सरकार पी.एम ई-बस सेवा स्कीम तैहत 200 इलेक्ट्रिक बसां शैहरी सार्वजनिक यातायात च शामिल करने लेई तैयार ऐ। एहू स्मार्ट बसां 100 जम्मू ते 100 श्रीनगर शैहर लेई ना। एहूदे पर 300 करोड़ रपे दी लागत आई ऐ ते एहूदा मकसद पर्यावरण गी विजन नुकसान पजाए दे यातायात गी बढ़ावा देना ऐं एहू बसां आधुनिक सरिस्ते आह्लियां, Panic buttons ते यात्रिएं दी सुरक्षा गी बेहतर करोग। सोशल मीडिया दी इक पोस्ट च ट्रांसपोर्ट मंत्री सतीश शर्मा होरें प्रधानमंत्री मोदी, गृह मंत्री अमित शाह हुंदा आभार जताया ते मुख्मंत्री उमर अब्दुल्ला हुंदे अनथक जतनें लेई बी उंदा आभार व्यक्त कीता जेदे करी एहू 200 बसां हासिल होइयां।

<><><><><><>

Easter

दुनिया दे बक्ख-बक्ख मुल्खें सने अजज भारत च बी ईस्टर दा ध्यार पारम्परिक शरदा ते उत्साह कन्नै मनाया जा'रदा ऐ। मुल्ख भरै दे गिरिजा घरें च विशेष प्रार्थना सभा आयोजित कीतियां गेइयां। इस मौके गी प्रार्थना, पराश्रित ते यीशू मसीह हुंदे जीवन दे खीरी चरण ते बलिदान गी चेत्ता करने दे पवित्तर सप्ताह दे समापन दे रूपै च दिक्खेआ जंदा ऐ। राष्ट्रपति द्रौपदी मुर्मू, उपराश्ट्रपति सी.पी राधाकृष्णन ते प्रधानमंत्री नरेंद्र मोदी होरें ईस्टर दे मौके पर सबनें गी ममारकबाद ते शुभकामनां दित्तियां ना।

<><><><><><>

Easter-Udh.

जम्मू-कश्मीर च बी इसाई बरादरी दे सदस्ये ईस्टर दा ध्यार मनाया ते धार्मिक जलूस कडे। उधमपुर च मुख् जलूस यूनियन चर्च थमां शुरू होआ ते एम.एच चौक, टाउन हॉल इलाका, दब्बड़ चोक ते गोल मार्केट शा लंगघदे होई परतियै यूनियन चर्च च जाइयै सम्पन्न होआ। यूनियन चर्च च विशप डॉक्टर संतोष थामस होरें यीशु मसीह दी शिक्षाएं पर आधारित इक लैक्चर बी दित्ता। इस मौके पर बोलदे होई विशप होरें आखेआ जे असेंगी हिर्ख-प्रेम ते भईचारे दा स्नेहा फैलाना लोड़चदा तां जे स्हाड़ा मुल्ख होर मजबूत होई सकै।

<><><><><><>

Prog. Announcement

आकाशवाणी जम्मू दा क्षेत्रीय समाचार एकांश विश्व सेहत दिवस 2026 दे सिलसिले च औंदी 7 अप्रैल गी मंगलवारें दिनें 12 बजे 25एं मिंटे दी इक विशेष परिचर्चा प्रसारित करोग जेहदा विशे होग, **together for health, stand with science** यानि के सेहत लेई इकजुट विज्ञान कन्नै खड़ोना। इस विशेष प्रसारण च स्हाड़ियां परौहिनयां होडन Dictation ते Nutrition expert Dr. Mitali Gupta होर जेह्दियां इस विशे पर अपने माहिराना बचार श्रोताएं कन्नै सांझे करडन। कार्यक्रम दी मेजबानी वरिष्ठ समाचार वाचक जगमोहन शर्मा होर करडन।

<><><><><><>

CET-Paramedic

जम्मू-कश्मीर व्यवसायिक प्रवेश परीक्षा बोर्ड नै अज्ज जम्मू-कश्मीर ते लद्दाख केंद्र शासित प्रदेशें च निर्धारित केंद्रें पर शैक्षणिक सत्र 2026-27 लेई 10मीं आधारित डिपलोमा पैरामेडिकल कोर्सें लेई सांझा दाखला म्तेहान दा आयोजन कीता। एहू म्तेयान जम्मू, डोडा, राजौरी, श्रीनगर, बारामूला, अनंतनाग ते लेह दे केई म्तेयान केंद्रें पर लैता गेआ जेह्दे च 1 ज्हार 591 आवेदके चा छडे 1 ज्हार 216 मेदवार म्तेयान च शामिल होए। ध्यानजोग ऐ जे

जम्मू-कश्मीर व्यवसायिक प्रवेश परीक्षा बोर्ड नै दुई बारी बारामुला, अनंतनाग, डोडा, राजौरी ते लेह च म्तेयान केंद्रें दी बवस्था कीती ऐ।

<><><><><><>

Railway Jammu Division

उत्तरी रेलवे दा नमा बनाया गेदा जम्मू डिविजन पूरी चाल्ली कम्म करा'रदा ऐ। डिविजनल रेलवे मैनेजर विवेक कुमार होरें आखेआ ऐ जे प्राथमिकता च बेहतर यात्री सुविधा, सुरक्षा, ढांचा बगैरा शामिल ऐ। उनें आखेआ जे एह इकाई हुन पूरी चाल्ली आत्मनिर्भर ऐ। जम्मू-कश्मीर च रेल राबता बेहतर होआ ऐ। बदाई गेदी सेवाएं च वंदे भारत एक्सप्रेस बी शामिल ऐ जेदे कन्नै सैलसफा च विस्तार होआ ऐ ते खित्ते च सुविधाएं च बड़ा मता सुधार होआ ऐ।

<><><><><><>

Poonch-for Restoration

पुंछ दे सगोसार विरसे दी सांभ-सम्भाल करने दी दिशा च इक महत्वपूर्ण गैंऽ पुट्टदे होई सरकार नै ऐतिहासिक पुंछ किले गी नमें सिरेआ सोआरने लेई निर्माण कम्म शुरू करी दित्ता ऐ। ध्यानजोग ऐ जे इस किले गी पिच्छे आए दे भूंचालें करी बड़ा मता नुकसान पुज्जा हा ते एहू बड़ी खराब हालत च पुज्जी गेदा हा। परियोजना दा शुरूआती चरण 3 करोड़ 90 लख रुपें दी अंदाजन लागत कन्नै किले दे अगले हिस्से गी सोआरने पर केंद्रित ऐ। एहू पूरा कम्म जम्मू-कश्मीर दे अभिलेखागार ते पुरातत्व विभाग दी दिक्ख-रिक्ख ते तकनीकी मार्गदर्शन च कीता जा'रदा ऐ। तोआई, पुंछ दे बसनीकें किले गी सोआरने दा कम्म शुरू होने पर बड़ी मती खुशी जाहिर कीती ऐ।

<><><><><><>

Weather

मौसम विभाग नै 10 अप्रैल तगर जम्मू-कश्मीर च मौसम गड़बड़ी आहला बने दे रौहने दी पेशगोई कीती ऐ। केई सारे इलाकें च हल्की थमां दरम्याने दर्जे दी बरखा ते बर्फबारी होने, ऐन पौने ते अंधी झक्खड़ चलने दी संभावना

जाहिर कीती ऐ। 7 थमां 9 अप्रैल तगर केई सारी थाहरें पर बरखा ते बर्फबारी होई सकदी ऐ। करसाने ते आम लोकें गी आखेआ गेआ ऐ जे ओहू पूरी एहतियात बरतन ते मौसम सरबन्धी परामर्श गी दिखदे रौहना।

<><><><><><>